

四庫全書

集部

欽定四庫全書

集部

漢魏六朝百三家集卷十五

十六

詳校官庶吉士<sub>臣</sub>謝恭銘

主事銜<sub>臣</sub>徐以坤覆勘

總校官檢討<sub>臣</sub>何思鈞

校對官編修<sub>臣</sub>盧遂

謄錄監生<sub>臣</sub>王宮

欽定四庫全書

漢魏六朝百三家集卷十五

漢李尤集題詞

後漢書文苑二十人李伯仁與其選亦蘭臺文  
章之傑也傳云著詩賦銘誄頌七歎哀典凡二  
十八篇今誄頌哀典俱不見七歎無傳惟有七  
歎豈歎字之訛耶其文寂寥非枚叔比也詩有  
九曲歌間屬闕文賦五首微質雅擬之上林長

楊則泰山丘垤也當時薦者稱其文有相如揚  
雄風何哉銘八十餘多體要之作及所匠意于  
子雲百官箴得其深矣摯仲治譏以穢病屈諸  
王莽鼎銘之下抑文家以少言為貴而多者難  
于見工也

目錄

賦

函谷關賦

平樂觀賦

東觀賦

德陽殿賦

辟雍賦

七

七款

銘

函谷關銘

孟津銘

河銘

洛銘

鴻池陂銘

井銘

明堂銘

太學銘

辟雍銘

永安宮銘

德陽殿銘

闕銘

雲臺銘

京師城門銘

正陽城門銘

高安館銘

平樂館銘

東觀銘

堂銘

門銘

中東門銘

上西門銘

上東門銘

關陽城門銘

津城門銘



旄城門銘

廣陽門銘

雍城門銘

夏城門銘

穀城門銘

室銘

楹銘

牖銘

琴銘

鐘簋銘

漏刻銘

鼎銘

古鼎銘

屏風銘

舟楫銘

寶劍銘

笛銘

車銘

天駟車銘

經梳銘

讀書枕銘

筆銘

墨硯銘

冠幘銘

文履銘

錯佩刀銘

金馬書刀銘

弧矢銘

弩銘

彈銘

盾銘

鉦銘

書案銘

牀几銘

鎧銘

良弓銘

轡銘

鞍銘

馬箠銘

卧牀銘

麀尾銘

薰鑪銘

安哉銘

羹魁銘

豐侯銘

箕銘

權衡銘

匱匣銘

武庫銘

圍棋銘

盤銘

樽銘

杯銘

印銘

鏡銘

靈壽杖銘

金羊燈銘

竈銘

席銘

鞠城銘

序

几銘序

詩

九曲歌





漢魏六朝百三家集卷十五目錄

欽定四庫全書

漢魏六朝百三家集卷十五

明 張溥 輯

漢李尤集

賦

函谷關賦

惟皇漢之休烈兮包八極以據中  
混無外之盪盪兮惟  
唐典之極崇萬國喜而洞洽兮何  
天衢以流通襟要約

之險固兮制關鍵以擒并其南則有蒼梧荔浦離水謝  
沐涯浦零中以窮海陸於北則有蕭居天井壺口石經  
貫越伐朔以臨胡庭緣邊邪指陽會玉門凌測龍堆或  
置於西則有隨龍武夷白水江零沔漢阻曲路繇山泉  
舊水遼濫沐落是經迺周覽以汎觀兮歷衆關以遊目  
惟夸濶之宏麗兮羌莫盛於函谷施雕礪以作好建峻  
敞之堅重殊中外以隔別翼巍巍之高崇命尉臣以執  
鑰統羣類之所從嚴固守之猛厲操戈鉞而普聰蕃鎮

造而惕息侯伯過而震惶惟函谷之初設險前有姬之  
苗流嘉尹喜之望氣知真人之西遊爰物色以遮道為  
著書而肯畱自周轍之東遷秦虎眙乎中州文馳齊而  
懼追謫雞鳴於狗偷睢背魏而西逝託衾衣以免搜大  
漢承弊以建德革厥舊而運修准令宜以就制因茲勢  
以立基蓋可以詰非司邪括執喉咽季末荒戎墮闕有  
年天閔羣黎命我聖君稽符皇乾孔適河文中興再授  
二祖同勛永平承緒欽明奉循上羅三關下列九門會

萬國之玉帛徠百蠻之貢琛冠蓋紛其雲合車馬動而  
雷奔察言服以有譏捐繻傳而勿論於以廓襟度於神  
聖法易簡於乾坤

平樂觀賦

乃設平樂之顯觀章秘瑋之奇珍習禁武以講捷厭不  
羈之遐鄰徒觀平樂之制鬱崔嵬以離婁赫巖巖其峯  
嶺紛電影以盤紆彌平原之博敞處金商之維陬大厦  
累而鱗次承岑堯之翠樓過洞房之轉闔歷金環之華

鋪南切洛濱北陵蒼山龜池決滸果林榛榛天馬沛艾  
鬣尾布分爾乃大和隆平萬國肅清殊方重譯絕域造  
庭四表交會抱珍遠并雜遝歸誼集於春正翫屈奇之  
神怪顯逸才之捷武百僚于時各命所主方曲既設秘  
戲連敘逍遙俯仰節以鞀鼓戲車高幢馳騁百馬連翩  
九沔離合上下或以馳騁覆車顛倒烏獲扛鼎千鈞若  
羽吞刀吐火燕躍鳥跼陵高履索踊躍旋舞飛丸跳劍  
沸渭回擾色渝隈一踰肩相受有仙駕雀其形蚺虬騎

驢馳射狐兔驚走侏儒巨人戲謔為耦禽鹿六駁白鳥  
朱首魚龍晏延隈岷山阜龜螭蟾蜍挈琴鼓缶

東觀賦

數華實於雍堂集幹質於東觀東觀之執萐萐洋洋上  
承重閣下屬周廊步西蕃以徙倚好綠樹之成行歷東  
厓之敞坐庇蔽芾之甘棠前望雲臺後匝德陽道無隱  
而不顯書無闕而不陳覽三代而采宜包郁郁之周文

德陽殿賦



開三階而參會錯金銀於兩楹入青陽而窺總章歷戶  
牖之所經連璧組之潤漫雜虬文之蜿蜒爾乃周閣迴  
匝峻樓臨門朱閣巖巖嵯峨檠雲青瑣禁門廊廡翼翼  
華蟲詭異密采珍縟達蘭林以西通中方池而特立果  
竹鬱茂以蓁蓁鴻雁沛裔而來集德陽之北斯曰濯龍  
葡萄安石蔓延蒙籠橘柚含桃甘果成叢文槐曜水光  
映煌煌

辟雍賦

辟雍巖巖規矩圓方階序牖闥雙觀四張流水湯湯造  
舟為梁神聖班惠由斯以匡王公羣后卿士具集攢羅  
鱗次差池襍遯延忠信之純德兮列左右之貂璫三后  
八蕃師尹羣卿加休慶德稱壽上觴戴甫垂畢其儀蹌  
蹌是以乾坤所周八極所要夷狄蠻羌儋耳哀牢重譯  
響應抱珍來朝南金大璐玉象犀龜

七

七款

奇宮閒館迴洞庭門井幹廣望重閣柘因夏屋渠渠嵯

峨合連前臨都街後據流川梁王

一作上

青黎

一作麗

盧橘

是生白華綠葉扶疎冬榮與時代序孰不墮零黃景炫  
一作紫炫眩林曜封金衣素裏

一作紫

班白內充滋味偉異淫樂

無窮副以茅柘豐弘誕節纖液玉津旨於飲蜜

銘

函谷關銘

函谷險要襟帶咽喉尹從李老畱作二篇孟嘗離秦奔

驚東征夜造稽疑謫以雞鳴范睢將入自盛以囊元鼎  
輩移錯之新安舍彼西阻東即高原長壙重關閒固不  
踰簡易易從與乾合符

孟津銘

洋洋河水赴宗于海經自中州龍圖所在黃函白神赤  
符以信昔有周武集會孟津魚入王舟迺往克殷

赴水  
經註

作朝

河銘

洋洋河水赴宗于海經自中州龍圖所在昔周武諸侯  
會于孟津魚入王舟乃往尅殷大漢承緒懷附遐鄰邦  
事來濟各貢厥珍

洛銘

洛出熊耳東流會集夏禹導疏經于洛邑元龜赤字漢  
符是立帝都通路建國南鄉萬乘終濟造舟為梁三都  
五州貢篚萬方廣視遠聽審任賢良元首昭明庶類是  
康

鴻池陂銘

水經注

鴻澤之陂聖王所規開水東注出自城池

井銘

井之所尚寒泉冽清法律取象不槩自平多取不損少  
汲不盈執憲若斯何有邪傾

明堂銘

布政之室上圓下方體則天地在國正陽窓闥四設流  
水洋洋順節行化各居其房春恤幼孤夏進賢良秋厲

武人冬謹闕梁

太學銘

漢遵禮典崇興六藝修周之理埽秦之弊褒建儒宮廣  
置異記開延學者勸以爵位

辟雍銘

惟王所建方中圓外清流四匝蕩滌濁穢

永安宮銘

合歡黃堂中和是遵舊廬懷本前果暢春

前一作新

候臺集

道俾司星辰豐業廣德以協天人萬福來助嘉娛永欣

德陽殿銘

皇穹垂象以示帝王紫微之側弘讓

一作誕

彌一作爾

光大

漢體天承以德陽崇弘高麗苞

一作色

受萬方內宗

一作綜

朝貢外示

一作供

遐荒

闕銘

皇上尊嚴萬姓載依國都攸處建設端闈表樹兩觀雙

闕巍巍



雲臺銘

周氏舊居惟漢襲因崇臺增峻

一作  
嘈嗽

上擬蒼雲垂示億

載俾率舊章人修

一作  
循

其行而國其昌

京師城門銘

天險匪登地險丘陵帝王設險乾坤是承

正陽城門銘

雒陽城  
十二門

平門督司午位處分外臨僚侍內達帝宮正陽南面炎

暑赫融

後漢書注平城  
司午厥位處中

高安館銘

巍巍高安明聖是修嶠嶢麗館窓闥列周長除臨起櫺  
檻相承聖朝明察同保休徵

平樂館銘

乃興平樂弘敞麗光層樓通閣禁闥洞房棼梁照曜朱  
華飾璫騁武舒秘以示幽荒如榮普覆然後來王

東觀銘

周氏舊區皇漢寔循房闥內布疏綺外陳升降三除貫

啓七門是謂東觀書籍林林列侯弘雅治掌藝文

堂銘

因邑致宅爰興殿堂夏屋渠渠高敞清涼家以師禮修  
奉烝嘗延賓西階主近東廂宴樂嘉客吹笙鼓簧

門銘

門之設張為宅表會納善閉邪擊柝防害

中東門銘

中東處仲月位當昴倉庚有聲隼鷹匿爪除去桎梏訟

獄勿考

上西門銘

上西在季位月惟戌菊黃豹察號令嚴悉

上東門銘

上東少陽厥位在寅條風動物月值孟春

關陽城門銘

闕一作開

關陽在孟位月惟巳清門

一作明

冠節太陽進起

津城門銘

津名自定位月在未

一作名有定位惟月在未

溫風鬱暑鴈鳥習鵲

旄城門銘

一作耗誤

旄門值季位月在辰順陽布惠貧乏是振

廣陽門銘

廣陽位孟厥月在申涼風從時白露已紛

雍城門銘

雍門處中位月在酉盲風寒濁鷺

一作雁

歸山阜

夏城門銘

夏門值孟位月在亥陰陽不通蝮螭匿彩迎冬北壇從陰所在

穀城門銘

穀門北中位當于丑太陰主刑殺伐為首

丑後漢書注  
作子為一作

事首一作子

室銘

室以安寧寢息幽閒室寒空隙遮過風寒無曰寂寞屋漏昭然

楹銘

幹強體正雖重不移上下相安高而不危

牖銘

天設窓牖開光照陰施于明堂以象八風

琴銘

琴之在音蕩滌邪心雖有

一作存

正性其感亦深存雅却

鄭浮侈是禁條暢和止

一作樂

樂而不淫

鐘簋銘

周因殷禮損益可知漢因於周猶若重規人曰秦器事有可施鴻鐘怒簋物得其宜聲揚遠聞文耀委迤

漏刻銘

玉海摘昏明數句為晉李充銘注云藝文有後漢李尤銘又有李充銘今攷藝

文兩載  
並作尤

昔在先聖配天垂則仰釐七曜俯順神德力一作乃建日

官俾立漏刻昏明既序景曜不忒唐命羲和敬授人時

懸象著明序以崇熙季末不虔德衰于茲挈壺失職一作

節刺流在詩聖哲稽古帝則是欽尺璧非寶重此寸陰



昧旦丕顯敬聽漏音思我王度如玉如金

鼎銘

五鼎大和滋味集具雖快其口損之為務

古鼎銘

王命尸臣官此拘邑賜爾和鸞黼黻琱弋尸臣拜手曰  
敢對揚天子丕顯休命

屏風銘

舍則潛避用則設張立必端直處必廉方雍閑風雅霧

露是抗奉上蔽下不失其常

舟楫銘

舟楫之利譬猶與馬載

一作輶

重歷遠以濟天下相風視

波窮究川野安審懼慎終無不可

寶劍銘

五材並用誰能去兵龍淵耀奇太阿飛名陸斷犀兕水  
截鯢鯨措紳咸服翼宣儀刑豈徒振武義合金聲

笛銘

出自南流離浩蕩

車銘

圓蓋象天方軫

一作與

則地輪法陰陽動不相離合

一作軫

之噓虛疏達開通兩輜障邪尊卑是從輓軌之用信義  
所同

天輶車銘

御覽作輶車

奚氏本造後裔飾雍輪以代步屏以蔽容輪輶并合出  
入周通追仁赴義惟禮是恭

經梳銘

瞻之在前忽焉在後進新習故不舍於口子在川上逝者如斯及年廣學無問不知

讀書枕銘

聽政理事怠則覽書傾倚偃息隨體興居寤心起意由愈宴娛

筆銘

筆之強志

一作忍

庶事分別七術雖衆猶可解說投足

一作

無擇言駟不及舌筆之過誤愆尤不減

墨硯銘

書契既造硯墨乃陳烟石附筆以流以申篇籍永垂紀  
志功勲

冠幘銘

冠為元服幘為首服君子敬慎自強不忒

文履銘

乃製茲履文質武斌允顯明哲卑以收身步此堤道絕

彼埃塵

錯佩刀銘

佩之有錯抑武揚文豈為麗好將戒其身

金馬書刀銘

巧冶鍊剛金託於刑貢文錯鏤兼勒工名淬以清流礪

以越石

一本無淬以二句

弧矢銘

弦木為弧剡木為矢弧矢協并八極同紀

一作協并八極四方同紀

弩銘

放自近古發意所覩前聖制方後世建弩機牙發矢執  
破醜虜克獲雖屢猶不可常忘戰者危極武者傷

彈銘

昔之造彈起意弦木以丸為矢合竹為樸漆飾以需不  
用筋角丸彈之利以弋鳬驚晉靈驕恃羣臣是彈樂其  
如躍趨如避丸

盾銘

吳旂魯敵戎兵特頒進則避刃爰以衛軀

鉦銘

申嚴號令誓師師旅以肅紀律萬衆是聽

書案銘

居則致樂承顏接賓承奉奏記通達詔制尊上答下道  
合仁義

牀几銘

虛左致賢設坐來賓筵牀對几盛養已陳殽仁飯義枕



典席文道可醉飽何必清醇西伯善養二老來遊

鎧銘

甲鎧之施扞禦鋒矢尚其堅剛或用犀兕內以存身外  
不相害有似仁人厥道廣大好德者寧好戰者危專智  
恃力君子不為

良弓銘

弓矢之作爰自曩時鄉射

一作材

載禮招命在詩鈔

一作力

稱顏高巧

一作功

發晉師

一作由基

不爭之美亦以辨儀

一作詳疑

轡銘

轡銜在手急緩必時賞罰在心和是思馬知良銜進取道理人知善政令行禁止

鞍銘

駉騫馳逐騰躍覆被雖其捷習亦有顛沛并羸其瓶罔不斯敗

馬箠銘

御者箠策示有威怒東野之敗督責過度

卧牀銘

體之所安寢處和歡夕惕敬慎崇德遠奸

麈尾銘

搗成德柄言為訓辭鑒彼逸傲念茲末茲

薰鑪銘

上似蓬萊吐氣委蛇芳烟布繞遙冲紫微

安哉銘

陶器

安哉令名甘旨是盛埏埴之巧甄陶所成食彼美珍思

此鹿鳴

羹魁銘

羊羹不徧駟馬長驅

豐侯銘

豐侯荒繆醉亂迷逸乃象其形為禮戒式後世傳之固  
無止說

箕銘

神農植穀以養蒸民箕主簸揚糠粃及陳

權衡銘

夫審輕重莫若權衡欲正是非其唯賢明

匱匣銘

國有都邑家有匣匱貨賄之用我之利器

武庫銘

搏噬爪牙鋒距之先毒螫芒刺矛矢以存聖人垂象五  
兵已陳

圍棋銘

詩人幽憶感物則思志之空閒翫弄遊意局為憲矩基  
法陰陽道為經緯方錯列張

盤銘

或以承觴或以受物既舉清觴又成口實

樽銘

樽設在堂以俟俊乂三山共承雕琢錯帶

杯銘

小之為杯大之為間杯間之用無施不可以飲以享慎

斯得正周公之美驕為病

印銘

赤紱在報非印不明  
榮傳符節非印不行  
龜紐犢鼻用爾作程

鏡銘

鑄銅為鑑整飾容顏  
修爾法服正爾衣冠

靈壽杖銘

亭亭奇幹寔曰靈壽  
甘泉潤根清露流莖  
乃制為杖扶

金羊燈銘  
危定傾既憑其實亦貴其名

金羊燈銘

賢哲勉務惟日不足金羊載耀作明以續

竈銘

燧人造火竈能以興五行接備陰陽相承

席銘

施席接賓士無愚賢值時所有何必羊豚

鞠城銘



圓鞠方牆倣象陰陽法月衡對二六相當建長立平其  
例有常不以親疎不有阿私端心平意莫怨其非鞠政  
由然況乎執機

序

几銘序

黃帝軒轅仁智恭恕恐事之有闕作與几之法

詩

九曲歌

年歲晚暮時已斜安得力士翻日車

闕

漢魏六朝百三家集卷十五

欽定四庫全書

漢魏六朝百三家集卷十六

漢馬融集題詞

漢世通儒並推季長廬涿郡鄭北海咸出其門  
家世貴戚居養豐澤即坐高堂施絳帳著書授  
生徒以老亦足以傳何汲汲榮仕也廣成一頌  
雕鏤萬物名雖諷諫鄧氏意在炫才感衆寧知  
適逢彼怒乎東巡頌質古簡言似季長韜光之

作安帝見而奇之召拜郎中文之遇不遇豈人意所及哉西羌反叛馬賢胡疇留兵不進季長懷河上之憂上書求効又陳星孛參畢戎狄將起觀其撫時奮發誠恥儒冠同腐草木乃心懲鄧氏恐怖梁冀既頌將軍西第又誣奏李太尉於死代人匠斲點染名賢斯文墜地百身莫贖矣季長注孝經云忠猶有關述仲尼之說而作忠經其文常人耳及讀本傳並未云季長作忠

經然則忠經果馬氏之書歟予不敢相信也范史  
譏融慮深垂堂不及胥靡予亦哀其儒者風流  
自隕漢陽之節重負南山擎季直矣

目錄

賦

長笛賦

圍棋賦

擣菹賦

琴賦

疏

上安帝請龐參等書

上論日蝕疏

上順帝乞自効疏

頌

廣成頌

東巡頌

書

為梁冀誣奏太尉李固書

與謝伯世書

與竇伯向書

序

忠經序

著述

忠經

漢魏六朝百三家集卷十六目錄



欽定四庫全書

漢魏六朝百三家集卷十六

明 張溥 輯

漢馬融集

賦

長笛賦 有序

融既博覽典雅精覈數術又性好音律能鼓琴吹笛而為督郵無留事獨臥郿縣平陽塢中有雒客舍逆旅吹

笛為氣出精列相龢融去京師踰年蹙聞甚悲而樂之  
追慕王子淵枚乘劉伯康傅武仲等簫琴笙頌唯笛獨  
無故聊復備數作長笛賦其辭曰

惟鐘籠之奇生兮於終南之陰崖託九成之孤岑兮臨  
萬仞之石磯特箭橐而莖立兮獨聆風於極危秋潦漱  
其下趾兮冬雪揣封乎其枝巔根跼之絜則兮感迴飈  
而將頽夫其面旁則重巘增石簡積頽砭兀婁行翳傾  
晁倚伏虜窳巧老港洞坑谷嶰壑澮峴嵒窰巖窳運衰

穿淩岡連嶺屬林簫蔓荆森慘柞樸於是山水猥至溇  
淦障潰頤淡滂流碓投澆穴爭湍華縈汨活澎湃波瀾  
鱗淪宏隆詭戾瀑瀑噴沫犇遯碣突搖演其山動杌其  
根者歲五六而至焉是以間介無蹊人迹罕到猿蜚畫  
吟鼯鼠夜叫寒熊振頷特麋昏髡山雞晨羣野雉朝雛  
求偶鳴子悲號長嘯由衍識道噍噍謹譟經涉其左右  
吮聒其前後者無晝夜而息焉夫固危殆險巖之所迫  
也衆哀集悲之所積也故其應清風也纖末奮箝錚鏘

營嘯若絙瑟促柱號鍾高調於是放臣逐子棄妻離友  
彭胥伯奇哀姜孝已攢乎下風收精注耳雷歎頽息搯  
膺擗標泣血泣流交橫而下通旦忘寐不能自禦於是  
乃使魯般宋瞿構雲梯抗浮柱蹉纖根跋義縷膺峭阨  
腹脛阻逮乎其上匍匐伐取挑截本末規摹驪矩變襄  
比律子野協呂十二畢具黃鍾為主矯揉斤械剗剗度  
擬鎬碣隕墜程表朱裏定名曰笛以觀賢士陳於東階  
八音俱起食舉雍徹勸侑君子然後退理乎黃門之高

廊重丘宋濯名師郭張工人巧士肄業修聲於是游閒  
公子暇豫王孫心樂五聲之絲耳比八音之調乃相與  
集乎其庭詳觀夫曲肅之繁會叢雜何其富也紛葩爛  
漫誠可喜也波散廣衍實可異也穿距劫選又足怪也  
啾咋嘈啐似華羽兮絞灼激以轉切震鬱怫以馮怒兮  
眩矚駭以奮肆氣噴勃以布覆兮乍躊躇以狼戾雷叩  
鍛之岌峇兮正瀏漂以風冽薄湊會而凌節兮馳趣期  
而赴躡爾迺聽聲類形狀似流水又象飛鴻汜濫溥漠

浩浩洋洋長轡遠引旋復迴皇充屈鬱律瞋菌硯秧鄧  
琅磊落駢田磅礴取予時適去就有方洪殺衰序希數  
必當微風纖妙若存若亡盡滯抗絕中息更裝奄忽滅  
沒曄然復揚或乃聊慮固護專美擅工漂凌絲簧覆冒  
鼓鐘或乃植持綴纏佻儻寬容蕭管備舉金石竝隆無  
相奪倫以宣八風律呂既蘇哀聲五降曲終闕盡餘絃  
更興繁手累發密櫛疊重踣躡攢仄蜂聚蟻同衆音猥  
積以送厥終然後少息暫忘雜弄間奏易聽駭耳有所

搖演安翔駘蕩從容闡緩惆悵怨懟窳圖寘赦聿皇求  
索乍近乍遠臨危自放若頽復反蚡緼蟠紆經宛螭  
篋笏抑隱行入諸變絞絜汨湟五音代轉按拏按臧遞  
相乘遭反商下徵每各異善故聆曲引者觀法於節奏  
察度於句投以知禮制之不可踰越焉聽籟弄者遙思  
於古昔虞志於怛惕以知長戚之不能間居焉故論記  
其義協比其象彷徨縱肆曠濆敞罔老莊之概也溫直  
優毅孔孟之方也激朗清厲隨光之介也牢刺拂戾諸

賁之氣也節解句斷管商之制也條決續紛申韓之察也繁縟絡繹范蔡之說也務標銚犢哲龍之惠也上擬法於韶箛南籥中取度於白雪淥水下采制於延露巴人是以尊卑都鄙賢愚勇懼魚鼈禽獸聞之者莫不張耳鹿駭熊經鳥伸鷗視狼顧拊譟踊躍各得其齊人盈所欲皆反中和以美風俗屈平適樂國介推還受祿澹臺載尸歸臯魚節其哭長萬輟逆謀渠彌不復惡蒯瞶能退敵不占成節鄂王公保其位隱處安林薄宦夫樂



其業士子世其宅鱣魚喁於水裔仰駟馬而舞玄鶴於  
斯時也綿駒吞聲伯牙毀絃瓠巴聃柱磬襄弛懸留眎  
瞠眙累稱屢讚失容墜席搏拊雷抃焦眇睢維涕洟流  
漫是故可以通靈感物寫神喻意致誠效志率作興事  
溉盥汙穢澡雪垢滓矣昔庖羲作琴神農造瑟女媧制  
簧暴卒為塤倕之和鍾叔之離磬或鑠金礱石華琬切  
錯九挺彫琢刻鏤鑽笮窮妙極巧曠以日月然後成器  
其音如彼唯笛因其天姿不變其材伐而吹之其聲如

此蓋亦簡易之義賢人之業也若然六器者猶以二皇  
聖哲黷益况笛生乎大漢而學者不識其可以裨助盛  
美忽而不讚悲夫有庶士丘仲言其所由出而不知其  
弘妙其辭曰近世雙笛從羌起羌人伐竹未及已龍吟  
水中不見已截竹吹之聲相似刺其上孔通洞之裁以  
當適便易持易京君明識音律故本四孔加以一君明  
所加孔後出是謂商聲五音畢

督郵官名主諸縣罰負殿糾攝之也鄔里名又營居  
曰鄔氣出精列古曲名劉玄字伯康作箏賦鐘籠竹

名九成九重也箭幹謂之橐揣與團古字通聚也巔  
根根生於巔也繫則危貌感觸也頽墜也面旁正面  
側旁也山之下小上濶者曰嶽簡大也顯砥石齊頭  
貌兀婁狝嶺峻險貌虜窳巧老深空貌港洞相通也  
小山別大山曰嶽澮嶽嶽壑深平貌嶽即坎也窞坎  
中小坎也窞窟也良注曰嶽壑澮嶽寬大而相連也  
嶽窞巖窞山下深闇窟穴也運衰迴旋相纏也穿淩  
卑下也向注運裏陰陽運氣裏之也穿淩氣之潤濕  
也林簫小竹蔓荊柞樸皆木名森慘長貌竹與諸物  
雜生也此言笛所產之地也猥衆也溥淥池也障隄  
也潰壞也頽淡滂流水搖蕩廣大貌確春也澆穴水  
注成穴也言水似春之投澆穴也爭湍急水草縈迴  
旋也汨活疾貌溇溇波聲鱗淪相次貌宗隆高下貌  
詭戾猶奇異也溇溇沸涌也雖似獼猴鼯鼠一名夷  
鷯一名飛生聲如人呼頤頤也昏視也髡鬣也迴視  
而起髡鬣也由衍行貌咆亂聲籍與稍同動也錚鎖

大聲營小聲嗃大呼也絙急絃也號鐘琴名言風動  
竹聲如急絃促柱鳴琴高調也彭彭咸諫紂不從而  
奔胥伍子胥伯奇尹吉甫之子聽後妻言逐之自傷  
無罪投河而死哀姜魯文公夫人子不得立而被殺  
歸齊過市而哭孝己殷中宗子事親一夜五起聽後  
妻言逐之搥膺叩心也擗標拊心貌言竹未成笛時  
水盪其根風動其梢而有此感人也隄落也岸峭者  
必隄言險也隄斷山也以膺服於峭隄而腹突於隄  
阻也鞞飾也夔后夔襄師襄子野師曠字十二六律  
六呂也黃鍾宮聲也宮為君故以為主矯揉者以火  
矯之斤械者以斧理之刺裁也刻銳也鉶大鑿中木  
也謂以木通節中也硲磨也隄墜竹節之屑墜落也  
翰注云硲以刀通節中也程示也程表外不加飾也  
朱裏以朱塗其內也以其滌穢故可觀士黃門署名  
習樂之處重丘地名宋灌郭張四姓漢時善樂者重  
丘所出也脗善注曰曲也濟注曰曲長曰脗也紛葩

爛熳聲散而多波散廣衍聲散而遠掌柱也運觸也  
啾咋聲衆而大也嘈啐聲貌鶻冠子曰南方萬物華  
羽焉故調以羽謂南方火其聲烈也絃灼激聲相繞  
激也憑怒大怒也眩聲貌瑒突也氣噴勃氣結笛中  
聲不散也布覆氣通而四覆也跼蹠其聲跼立如有  
所蹠履也鍛椎也皮峇叩椎之聲瀏漂風冽聲隨風  
而清寒也薄湊會聲相集湊而會合也節曲之節其  
聲溢出故曰凌節駛疾也期亦節也躡下也疾趣則  
其聲散而赴于下也琴道曰伯夷操似鴻雁之音故  
云象飛鴻奮善注視也翰注被也言似流水飛鴻相  
被遠引不絕也旋復迴皇去住不定高下不常貌充  
屈二句善注衆聲鬱積競出貌濟注鬱結不散貌鄧  
琅二句衆聲宏大四布貌衰序差其次序也蓋與爐  
同餘也抗極也裝束也更裝者謂中道息聲更調理  
而次之也抗絕則奄忽而減更裝則又復揚也聊慮  
精心也固護堅志也漂凌謂過之覆冒謂掩之也綴

繩也植立而相引持似緼纏也伯儼寬間貌八風八方之風降罷退也言聲成五降而息也餘絃笛聲似擊絃之餘響也密櫛密如櫛也蹈蹈迫蹙也攢仄攢聚也蹈蹈二句正衆音猥積之狀曲將終衆音畢出而送之也搖演心神清貌安翔貽蕩從容闡緩皆聲初發或起或伏寬容閑緩也窳園聲下貌寔赦聲緩也聿皇疾貌求索相合擊也蚡蜺蠕紆聲相糾紛也經宛蛻蟪盤屈搖動貌篋笏抑隱手尋笛孔也絞緊汨湟聲相切磨也按拏按臧謂索持而推抑之也遭遭迴也反商下徵變調也引亦曲也投與逗古通猶章句也蓬弄小曲也翰云蓬雜也長戚長憂也間居獨處也節奏句逗之中有禮制此正聲也蓬弄則繁雜小聲矣故遠想古人心虞怛惕也曠濊敞罔寬大間幽也牢刺牢落乖刺也續亂也紛五臣作理亂而能理也芳櫛銚愷分別節制之貌哲龍鄧哲公孫龍皆辯士也南籥以篇舞也文王之樂白雪淥水古曲

名延露巴人小曲也鹿性多驚故云駭熊經如熊之  
攀樹而引氣也鳥伸引頸也鷗視舉首而視狼顧反  
顧也各得其齊言得其分齊不相踰也屈平以下言  
各反其常性也左傳曰介之推從晉文公出亡後賞  
從亡者推不言祿隱而死博物志曰澹臺子溺於江  
弟子欲收之曰螻蟻何親魚鯢何仇弟子曰何夫子  
之不慈乎曰生為吾子死非吾鬼遂不收葬詩傳曰  
孔子出遊聞哭聲甚悲則臯魚也問其故曰吾少好  
學周流天下吾親死一失也高尚其志不事庸君而  
晚仕無成二失也少擇交遊寡親友老無所託三失  
也樹欲靜而風不寧子欲養而親不待立哭而死左  
傳曰南宮長萬弑宋閔公又曰鄭伯將以高渠彌為  
卿昭公惡之固諫不聽昭公立弑之又曰蒯賁衛太  
子登鐵丘望鄭師衆自投車下詩傳曰陳不占齊人  
崔杼弑莊公不占將往赴之食則失哺上車失軼其  
僕曰敵在數百里外而懼怖如此雖往其益乎不占

曰死君之難義也無勇私也至公門外聞鐘鼓聲駭而死喁魚口上見也魚喁水裔即伯牙鼓琴魚出聽也仰秣即瓠巴鼓瑟駟馬仰秣也尚書大傳曰虞舜歌樂曰和伯之樂舞玄鶴耳安也睦直視也眙驚貌搏拊舉手也雷井同拊手也焦眇睢維目開合之貌暴辛周時諸侯塤土樂燒土為之大如鷄卵三孔僅舜時人丘仲漢武時人不見己不見其身也聲相似與龍吟相似也剡削也適馬策也易京京房也字君明武帝時人修易故曰易京尤好音律知五聲笛本四孔少商聲房加孔子下為商也

櫛 圓 繫 梟 颶 標 頽 氫 砭 玉 婁 簞 狝 宜 鬻 凝 摩 囂 窳 硃 峴

兌 嶠 坎 窞 淡 窞 伏 穿 汙 安 遏 慘 參 柞 乍 頽 憾 渴 學 碣 唐

雌 位 頷 憾 賡 加 彭 標 噉 啾 營 榮 絙 亘 阢 襍 獲 畫 總 恩 硃 同



還迂眩宏峇渴齋蜜縱愁怡翅儼毅窳窳圖盍赦赦

經因壇善筏泯授唯筵初勢黎愴獲鱗尋耳點貽翅

皖患挺抽筭延筭鑿甞倫上適

### 圍棋賦

略觀圍棋兮法於用兵三尺之局兮為戰場陳聚士  
卒兮兩敵相當拙者無功兮弱者先亡自有中和兮請  
說其方先據四衛兮保角依旁緣邊遮列兮往往相望  
離離馬首兮連連雁行踔度間置兮徘徊中央達閭奮

翼兮左右翱翔道狹敵衆兮情無遠行棋多無筭兮如聚羣羊駱驛自保兮先後來迎攻寬擊虛兮踰踰內房利則為時兮便則為強厭于食兮壞決垣墻堤潰不塞兮泛濫遠長橫行陣亂兮敵心駭惶迫兼棋雜兮頗棄其裝已下險口兮鑿置清坑窮其中郢兮如鼠入囊收死卒兮無使相迎當食不食兮反受其殃勝負之策兮于言如髮乍緩乍急兮上且未別白黑分亂兮于約如葛雜亂交錯兮更相度越守規不固兮為所唐突深入

貪地兮殺亡士卒狂攘相救兮先後并沒上下離遮兮  
四面隔閉圍合罕散兮所對哽咽韓信將兵兮難通易  
絕自陷死地兮設見權譎誘敵先行兮往往一室損褻  
委食兮三將七卒馳逐爽問兮轉相周密商度地道兮  
期相盤結蔓延連閣兮如火不滅扶疎布散兮左右流  
溢浸淫不振兮敵人慙慄迫役踧踖兮惆悵自失計功  
相除兮以時早訖事留變生兮收拾欲疾營惑窘乏兮  
無令詐出深念遠慮兮勝乃可必

擣菹賦

昔玄通先生遊於京都衛惠既備好此擣菹伯陽入戎  
以斯消憂枰則素旃紫扇出乎西鄰緣以績繡紵以綺  
丈栢則搖木之幹出自崑山矢則藍田之石卞和所攻  
含精玉潤不細不洪馬則玄犀象牙是礪是礪栢為上  
將木為君副齒為號令馬為翼距籌為策動天法卒數  
於是芬葩貴戚公侯之儔坐華櫬之高殿臨激水之清  
流排五木散九齒勒良馬取衛里是以戰無常勝時有

逼逐臨敵攘圉事在將帥見利電發紛綸滂沸精誠一  
叫十盧九雉磊落蹀躞并來猥至先名所射應聲紛潰  
勝貴歡悅負者沈悴

琴賦

惟梧桐之所生在衡山之峻陂於是遯間公子中道失  
志孤鶩特行裏閔抱思昔師曠三奏而神物下降玄鶴  
二八軒舞於庭何琴德之深哉

疏

上安帝請龐參等書

元初中參為護羌校尉擊先零羌為其所敗  
乃稱病引兵還坐詐徵下獄校書郎中馬融  
上書請之書

奏赦參等

伏見西戎反叛寇鈔五州陛下愍百姓之傷痍哀黎元  
之失業單竭府庫以奉軍師昔周宣獫狁侵鎬及方孝  
文匈奴亦略上郡而宣王立中興之功文帝建太宗之  
號非惟兩主有明叡之資抑亦扞城有虓虎之助是以  
南仲赫赫列在周詩亞夫赳赳載于漢策竊見前護羌

校尉龐參文武昭備智略弘遠既有義勇果毅之節兼  
以博雅深謀之姿又度遼將軍梁懂前統西域勤苦數  
年遠留三輔功效克立間在北邊單于降服今皆幽囚  
陷于法網昔荀林父敗績于邲晉侯使復其位孟明視  
喪師於崤秦伯不替其官故晉景并赤狄之土秦穆遂  
霸西戎宜遠覽二君使參懂得在寬宥之科誠有益于  
折衝毗佐于聖化

上論日蝕疏

延光四年三月戊午朔日有蝕之在胃十二度隴西酒泉朔方各以狀上史官不覺是時

融為許  
令上書

伏讀詔書陛下深惟禹湯罪已之義歸咎自責寅畏天  
戒詳延百僚博問公卿知變所自審得厥故修復往術  
以答天命臣子遠近莫不延頸企踵苟有隙空一介之  
知事願自效貢納聖聽臣伏見日蝕之占自昔典籍十  
月之交春秋傳記漢注所載史官占候羣臣密對陛下  
所觀覽左右所諷誦可謂詳悉備矣雖復廣問陷在前



志無以復加乃者第氣於參臣前得敦朴之人後三年  
二月對策北宮端門以為參者西方之位其於分野并  
州是也殆謂西戎北狄其後種羌叛戾烏桓犯上郡并  
涼動兵驗略效矣今復見大異申誠重譴於此二城海  
內莫見三月一日合辰在婁婁又西方之宿衆占顯明  
者羌及烏桓有悔過之辭將吏策勲之名臣恐受任典  
牧者苟脫目前皆粗圖身一時之權不顧為國百世之  
利論者美近功忽其遠則各相不大疾病伏惟天象不

虛老子曰圖難於其易也為大於其細也消災復異宜在於今詩曰日月告凶不用其行四國無政不用其良傳曰國無政不用善則自取謫于日月之災故政不可不慎也務三而已一曰擇人二曰安民三曰從時臣融伏惟方今有道之世漢典設張侯甸采衛司民之吏案繩循墨雖有殿最所差無幾其陷罪辟身自取禍百姓未被其大傷至邊郡牧御失和吉之與凶敗之與成優劣相懸不誠不可審擇其人以上以應天變下以安民隸

竊見列將子孫生長京師食仰租奉不知稼穡之艱又希遭阨困故能果毅輕財施與孤弱以獲死生之用此其所長也不拘法禁奢泰無度功勞足以宣威踰濫足以傷化此其所短也州郡之士出自貧苦長於檢押難專賞罰不敢越溢此其所長也拘文守法遭遇非常狐疑無斷畏首畏尾威恩纖薄外內離心士卒不附此其所短也必得將兼有二長之材無二短之累參以吏事任以兵法有此數姿然後能折衝厭難致其功實轉災

為福孔子曰十室之邑必有忠信如丘者焉以天下之大四海之衆云無若人臣以為誣矣宜特選詳譽審得其真鎮守二方以應用良擇人之義以塞大異也

上順帝乞自効疏

融陽嘉中大將軍梁商表為從事中郎轉武都太守時西羌反叛征西將軍馬賢與護羌校尉胡貳征之稽遲不進融知其將敗上疏乞自効朝廷不能用

今雜種諸羌轉相鈔盜宜及其未并亟遣深入破其支黨而馬賢等處處留滯羌胡百里望塵千里聽聲今逃

匿避回漏出其後則必侵寇三輔為民大害臣願請賢  
所不可用關東兵五千裁假部隊之號盡力率厲埋根  
行道以先軍士三旬之中必克破之臣少習學藝不更  
武職猥陳此言必受誣罔之辜昔毛遂廝養為衆所蚩  
終以一言克定從要臣懼賢等專守一城言攻於西而  
羌出於東且其將士必有高克潰叛之變

頌

廣成頌

融拜校書郎中詣東觀校秘書是時鄧太后臨朝騰兄弟輔政謂文德可興武功宜廢遂寢蒐狩之禮息戰陳之法故猾賊從橫乘此無備融乃感激以為文武之道聖賢不墜五才之用無或可廢元初二年上廣成頌以諷諫頌奏忤鄧氏滯於東觀十年不調

臣聞孔子曰奢則不遜儉則固奢儉之中以禮為界是以蟋蟀山樞之人並刺國君諷以太康馳驅之節夫樂而不荒憂而不困先王所以平和府藏頤養精神致之無疆故夏擊鳴球載於虞謨吉日車攻序於周詩聖主賢君以增盛美豈徒為奢淫而已哉伏見元年以來遭

值亢運陛下戒懼災異躬自菲薄荒棄禁苑廢弛樂懸  
勤憂潛思十有餘年以過禮數重以皇太后體唐堯親  
九族篤睦之德陛下履有虞烝烝之孝外舍諸家每有  
憂疾聖恩普勞遣使交錯稀有曠絕時時寧息又無以  
自娛樂殆非所以逢迎太和裨助萬福也臣愚以為雖  
尚頗有蝗蟲今年五月以來雨露時澍祥應將至方涉  
冬節農事間隙宜幸廣成覽原隰觀宿麥勸收藏因講  
武校獵使寮庶百姓復覩羽旄之美聞鐘鼓之音歡欣

喜樂鼓舞疆畔以迎和氣招致休慶小臣螻蟻不勝區區職在書籍謹依舊文重述蒐狩之義作頌一篇并封上淺陋鄙薄不足觀省臣聞昔命師於韃橐偃伯于靈臺或人嘉而稱焉彼固未識夫雷霆之為天常金革之作昏明也自黃炎之前傳道罔記三五以來越可略聞且區區之鄴郊猶廓七十里之囿盛春夏之苗詩詠圃草樂奏騶虞是以大漢之初基也宅茲天邑總風雨之會交陰陽之和揆厥靈囿營于南郊徒觀其垌場區宇



恢昭曠蕩藐覓勿罔寥豁鬱決騁望千里天與地莽於  
是周陸環瀆右轡三塗左概嵩嶽面據衡陰箕背王屋  
浸以波滌黃以滎洛金山石林殷起乎其中峨峨磴磴  
鏘鏘唯唯隆穹槃回嵎峴錯崔神泉側出丹水湜池怪  
石浮磬耀焜于其陂其土毛則摧牧薦草芳茹甘荼芘  
其芸菹昌本深蒲芝蒿莖莖叢荷芋蕰桂荏鳧葵格韭  
蒞于其植物則玄林包竹藩陵蔽京珍林嘉樹建木叢  
生椿梧栝柏柜柳楓楊豐彤對蔚峯嶺額慘爽翕習春風

含津吐榮鋪于布護唯危難熒惡可殫形至于陽月陰  
慝害作百草畢落林衡戒田焚萊柞木然後舉天網頓  
八絃擘斂九數之動物縲索四野之飛征鳩之乎茲囿  
之中山敦雲移羣鳴膠膠鄙駭譟謹子野聽聳離朱目  
眩隸首策亂陳子籌昏於時營圍恢廓充斥川谷罽置  
羅羅彌綸阡澤臯牢陵山校隊案部前後有屯甲乙相  
伍戊巳為堅乘輿乃以吉月之陽朔登於疏樓之金路  
六驪駛之玄龍建雄虹之旌夏揭鳴鳶之修橦曳長庚

之飛髻載日月之太常棲招搖與玄戈注枉矢於天狼  
羽毛紛其髟鮑揚金叟而拖玉瓊屯田車于平原播同  
徒于高岡旃旒摻其如林錯五色以摛光清氛埃掃野  
場誓六師搜雋良司徒勒卒司馬平行車攻馬同教達  
戒通伐鑿鼓撞華鐘獵徒縱赴榛叢徽婁霍奕別驚分  
奔騷擾聿皇往來交舛紛紛回回南北東西風行雲轉  
匈磔隱旬黃塵勃瀚闇若霧昏日月為之籠光列宿為  
之翳昧僂狡課才勁勇程氣狗馬角逐鷹鷂競驚驍騎

旁佐輕車橫厲相與陸梁聿皇於中原絹狽踧銳特肩  
脰完羝撫介鮮散毛族枯羽羣然後飛鋌電激流矢雨  
墜各指所質不期俱殪竄伏扔輪發作梧輶殺及狂擊  
頭陷顱碎獸不得豫禽不得瞥或夷繇未殊顛狽頓躑  
螻螻蟬蟬充衢塞隧葩華萍布不可勝計若夫鷙獸毅  
蟲倨牙黔口大匈哨後緼巡歐紆負隅依阻莫敢嬰禦  
乃使鄭叔晉婦之徒睽孤剗刺裸裎袒裼冒櫟柘撻棘  
枳窮浚谷底幽嶰暴斥虎搏狂兕獄齧熊祛封豨或輕

詵越悍庾疏婁領犯歷嵩巒陵喬松履修楸蹕趨枝杪  
標端尾蒼雉倚元援木產盡寓屬單窄罔合部層弋同  
曲類行竝驅星布麗屬曹伍相保各有分局矰落飛流  
纖羅絡縹遊雉羣驚晨鳧輩作顰然雲起雪爾電落爾  
乃蘋觀高蹈改乘回轅沂恢方撫馮夷策句芒超荒忽  
出重陽厲雲漢橫天潢導鬼區徑神場詔靈保召方相  
驅厲疫走蜮祥捎罔兩拂游光砌天狗縹墳羊然後緩  
節舒容裴回安步降集波灊川衡澤虞矢魚陳罟茲飛

宿沙田開古盡輦終葵揚關斧刊重冰撥蟄戶測潛鱗  
踵介旅逆獵湍瀨濟薄汾撓淪滅潭淵左挈夔龍右提  
蛟鼉春獻王鮪夏薦鼈黿於是流覽徧照殫變極態上  
下究竟山谷蕭條原野嶢嶢上無飛鳥下無走獸虞人  
植旂獵者效具車弊田罷旋入禁囿棲遲乎昭明之觀  
休息乎高光之榭以臨乎宏池鎮以瑤臺純以金堤樹  
以蒲柳被以綠莎瀟漾沆瀣錯紵槃委天地虹洞固無  
端涯大明生東月朔西陂乃命壺涿驅水蠱逐罔螭滅

短狐簪鯨鯢然後方餘皇連舫舟張雲帆施蜺幃靡颺  
風陵迅流發棹歌縱水謳淫魚出著蔡浮湘靈下漢女  
游水禽鴻鵠鴛鴦鷗鷺鵠鷓鴣鷺鷥乃安斯寢  
戢翮其涯魴鱖鰓鯉鰕鱖樂我純德騰踊相隨雖  
靈沼之白鳥孟津之躍魚方斯茂矣然猶詠歌於伶蕭  
載陳於方策豈不哀哉於是宗廟既享庖廚既充車徒  
既簡器械既攻然後擺牲班禽於賜犒功羣師疊伍伯  
校千重山巘常滿房俎無空酒正案隊膳夫巡行清醪

車湊燭炙騎將鼓駭舉爵鐘鳴既觴若乃陽阿哀斐之  
晉制闡鼉華羽之南音所以洞蕩勾臆發明耳目疏越  
蘊愴駭恫底伏鏗鏘鎗鎗奏於農郊大路之衢與百姓  
樂之是以明德耀乎中夏威靈暢乎四荒東隣浮巨海  
而入享西旅越蔥嶺而來王南徼因九譯而致貢朔狄  
屬象胥而來同蓋安不忘危治不忘亂道在乎茲斯固  
帝王之所以曜神武而折遐衝者也方今大漢收功于  
道德之林致平於仁義之淵忽蒐狩之禮闕槃虞之佃



闇昧不覩日月之光聾昏不聞雷霆之震於今十二年  
為日久矣亦方將刊禁臺之秘藏發天府之官常繇質  
要之故業率典刑之舊章采清原嘉岐陽登俊傑命賢  
良舉淹滯拔幽荒察淫侈之華譽顧介特之實功聘畎  
畝之羣雅宗重淵之潛龍乃儲精山藪歷思河澤目矚  
鼎俎耳聽康衢營傳說於胥靡求伊尹於庖廚索膠鬲  
於魚鹽聽甯戚於大車俾之昌言而宏議軼越三家馳  
騁五帝悉覽休祥總括羣瑞遂棲鳳皇於高梧宿麒麟

於西園納焦僊之珍羽受王母之白環永逍遙於宇內  
與二儀乎無疆貳造化於后土參神施於昊乾超特達  
而無傳煥巍巍而無原豐千億之子孫歷萬載而永延  
禮樂既闋北轅反旆至自新城背伊闕反洛京

東巡頌

安帝親政召融還郎署復在講部出為河間  
王廐長時車駕東巡岱宗融上東巡頌帝奇  
其文召  
拜郎中

允迪在昔紹烈陶唐殷天衷克搖光若時則運瓊衡敷

六典經八成肆類乎上帝實柴乎三辰禋祀乎六宗祇  
燎乎羣神遂發號羣司申戒百工卜筮稱吉著龜襲從  
南征有時馮相告祥清夷道而後行曜四國而揚光展  
聖義於巡狩喜圻時而咏八荒指宗嶽以為期固岱神  
之所望散齋既畢越翼良辰棫櫨增構烈火燔燃暉光  
四煬炎爛薄天蕭香肆升青煙冒雲珪璋戔戔犧牡潔  
純鬱鬯宗彝明水玄樽空桑孤竹咸池雲門六八匝變  
神祇竝存

太平御覽經八成下有變  
和萬殊總領神明二句

書

為梁冀誣奏太尉李固書

質帝初立梁太后委任宰輔固多所匡正冀每相忌疾遂誣奏固時融在座為冀章草冀長史吳祐面責融曰李公之罪成于卿手冀怒起入祐亦竟去書奏太后不聽

臣聞君不稽古無以承天臣不述舊無以奉君昔堯殂之後舜仰慕三年坐則見堯于墻食則覩堯於羹斯所謂聿追來孝不失臣子之節者太尉李固因公假私依正行邪離間近戚自隆支黨至於表舉薦達例皆門徒

及所辟召靡非先舊或富室財賂子壻婚屬其列在官  
牒者凡四十九人又廣選賈豎以補令史募求好馬臨  
憲呈試出入踰侈輜輶曜日大行在殯路人掩涕固獨  
胡粉飾貌搔頭美姿槃旋偃仰從容冶步曾無慘怛傷  
悴之心山陵未成違矯舊制善則歸已過則歸君斥逐  
近臣不得侍送作威作福莫固之甚臣聞台輔之位實  
和陰陽璇璣不平寇賊姦軌則責在太尉固受任之後  
東南跋扈兩州數郡千里蕭條兆人傷損大化陵遲而

詆疵先主苟肆狂狷存無廷爭之忠沒有誹謗之說夫  
子罪莫大於累父臣惡莫深於毀君固之過釁事合誅  
辟

與謝伯世書

頃憤憤愁思猶不解懷思在竹間放狗逐麋晚秋涉冬  
大倉出籠黃棘下菟茅以乾葵以送餘日茲樂而已

文藝

類聚 憤憤尺牘作憤  
憤誤以送一作自送

與竇伯向書

章字伯向好學有文與馬融崔  
瑗同好更相推薦融與章書

孟陵奴來賜書見手迹歡喜何量次於面也書雖兩紙

八行行七字七八五十六字百一十二言耳

馬融集  
後漢志注

馬融對策曰大中之道在  
天為北辰在地為人君

## 序

### 忠經序

忠經者蓋出於孝經也仲尼說孝者所以事君之義則  
知孝者俟忠而成之所以答君親之恩明臣子之分忠

不可廢于國孝不可弛于家孝既有經忠則猶闕故述仲尼之說作忠經焉今皇上含庖軒之姿韞勛華之德弼賢俾能無遠不舉忠之與孝天下攸同臣融巖野之臣性則愚朴沐浴德澤其可默乎作為此經庶少裨補雖則辭理薄陋不足以稱焉忠之所存存於勸善勸善之大何以加於忠孝者哉夫定高卑以章目引詩書以明綱吾師於古曷敢徒然其或異同者變易之宜也或對之以象其意或遷之以就其類或損之以簡其文或



益之以備其事以忠應孝亦著為十有八章所以洪其  
至公勉其至誠信本為政之大體陳事君之要道始於  
立德終於成功此忠經之義也謹序

忠經

天地神明章第一

昔在至理上一德以徵天休忠之道也天之所覆地  
之所載人之所履莫大乎忠忠者中也至公無私天無  
私四時行地無私萬物生人無私大亨貞忠也者一其

心之謂矣為國之本何莫繇忠忠能固君臣安社稷感  
天地動神明而況于人乎夫忠興于身著于家成于國  
其行一焉是故一于其身忠之始也一于其家忠之中  
也一於其國忠之終也身一則百禄至家一則六親和  
國一則萬人理書云惟精惟一允執厥中

聖君章第二

聖君以聖德監於萬邦自下至上各有尊也故王者上  
事於天下事於地中事於宗廟以臨於人則人化之天

下盡忠以奉上也是以兢兢戒慎日增其明祿賢官能  
式敷大化惠澤長久黎民咸懷故得皇猷丕顯行於四  
方揚於後代以保社稷以光祖考蓋聖君之忠也詩云  
昭事上帝聿懷多福

冢臣章第三

為臣事君忠之本也本立而後化成冢臣於君可謂一  
體下行而上信故能成其忠夫忠者豈惟奉君忘身狗  
國忘家正色直辭臨難死節已矣在乎沈謀潛運正國

安人任賢以為理端委而自化尊其君有天地之大日月之明陰陽之和四時之信聖德洋溢頌聲作焉書云元首明哉股肱良哉庶事康哉

百工章第四

有國之建百工惟才守位謹常非忠之道故君子之事上也入則獻其謀出則行其政居則思其道動則有儀秉職不回言事無憚苟利社稷則不顧其身上下用成故昭君德蓋百工之忠也詩云靖共爾位好是正直

守宰章第五

在官惟明莅事惟平立身惟清清則無欲平則不曲明  
能正俗三者備矣然後可以理人君子盡其忠能以行  
其政令而不理者未之聞也夫人莫不欲安君子順而  
安之莫不欲富君子教而富之篤之以仁義以固其心  
導之以禮樂以和其氣宣君德以弘大其化明國法以  
至於無刑視君之人如觀乎子則人愛之如愛其親蓋  
守宰之忠也詩云豈弟君子民之父母

兆人章第六

天地泰寧君之德也君德昭明則陰陽風雨以和人賴之而生也是故祇承君之法度行孝悌於其家服勤稼穡以供王賦此兆人之忠也書云一人元良萬邦以貞

政理章第七

夫化之以德理之上也則人日遷善而不知施之以政理之中也則人不得不為善懲之以刑理之下也則人畏而不敢為非也刑則在省而中政則在簡而能德則

在博而久德者為理之本也任政非德則薄任刑非德則殘故君子務於德修於政謹於刑固其忠以明其信行之匪懈何不理之人乎詩云敷政優優百禄是道

### 武備章第八

王者立武以威四方安萬人也淳德布洽戎夷稟命統軍之帥仁以懷之義以厲之禮以訓之信以行之賞以勸之刑以嚴之行此六者謂之有利故得師盡其心竭其力致其命是以攻之則克守之則固武備之道也詩

云赳赳武夫公侯干城

觀風章第九

惟臣以天子之命出于四方以觀風聽不可以不聰視  
不可以不明聰則審于事明則辨於理理辨則忠事審  
則公君子去其私正其色不害理以傷物不憚勢以舉  
任惟善是與惟惡是除以之而陟則有成以之而出則  
無怨夫如是則天下敬職萬邦以寧詩云載馳載驅周  
爰諮諏



保孝行章第十

夫惟孝者必貴于忠忠苟不行所率猶非其道是以忠不及之而失其守匪惟危身辱及親也故君子行其孝必先以忠竭其忠則福祿至矣故得盡愛敬之心以養其親施及于人此之謂保孝行也詩云孝子不匱永錫爾類

廣爲章第十一

明主之爲國也任於正去於邪邪則不忠忠則必正有

正然後用其能是故師保道德股肱賢良內睦以文外  
威以武被服禮樂隄防政刑故得大化興行蠻夷率服  
人臣和悅邦國平康此君能任臣下忠上信之所致也  
詩云濟濟多士文王以寧

廣至理章第十二

古者聖人以天下之耳目為視聽天下之心為心端旒  
而自化居成而不有斯可謂至理也已矣王者思於至  
理其遠乎哉無為而天下自清不疑而天下自信不私

而天下自公賤珍則人去貪徹侈則人從儉用實則人不偽崇讓則人不爭故得人心和平天下淳質樂其生保其壽優游聖德以為自然之至也詩云不識不知順帝之則

揚聖章第十三

君德聖明忠臣以榮君德不足忠臣以辱不足則補之聖明則揚之古之道也是以虞有德咎繇歌之文王之道周公頌之宣王中興吉甫詠之故君子臣於盛明之

時必揚之盛德流滿天下傳于後代其忠矣夫

辨忠章第十四

大哉忠之為用也施之於邇則可以保家邦施之於遠則可以極天地故明王為國必先辨忠君子之言忠而不佞小人之言佞而似忠而其聞之者鮮不惑矣夫忠而能仁則國德彰忠而能知則國政舉忠而能勇則國難清故雖有其能必由忠而成也仁而不忠則私其恩知而不忠則文其詐勇而不忠則易其亂是雖有其能

以不忠而敗也此三者不可不辨也書云旌別淑慝其是謂乎

忠諫章第十五

忠臣之事君也莫先于諫下能言之上能聽之則王道  
光矣諫於未形者上也諫於已彰者次也諫於既行者  
下也違而不諫則非忠臣夫諫始於順辭中於抗議終  
於死節以成君休以寧社稷書云木從繩則正后從諫  
則聖

證應章第十六

惟天監人善惡必應善莫大於作忠惡莫大於不忠忠則福祿至焉不忠則刑罰加焉君子守道所以長守其休小人不常所以自陷其咎休咎之徵也不亦明哉書云作善降之百祥作不善降之百殃

報國章第十七


為人臣者官於君先後光慶皆君之德不思報國豈忠也哉君子有無祿而益君無有祿而已者也報國之道

有四一曰貢賢二曰獻猷三曰立功四曰興利賢者國之幹猷者國之規功者國之將利者國之用是皆報國之道惟其能而行之詩云無言不酬無德不報況忠臣之於國乎

盡忠章第十八

天下盡忠淳化行也君子盡忠則盡其心小人盡忠則盡其力盡力者則止其身盡心者則洪於遠故明王之理也務在任賢賢臣盡忠則君德廣矣政教以之而美

禮樂以之而興刑罰以之而清仁惠以之而布四海之  
內有太平音嘉祥既成告于上下是故播於雅頌傳於  
無窮



漢魏六朝百三家集卷十六